

DEO OPTIMO MAX. UNI ET TRINO,

VIRGINI DEI - PARÆ, ET S. LUCÆ,
Orthodoxorum Medicorum Patrono.

QUÆSTIO MEDICO-CHIRURGICA. QUOD LIBETARIIS DISPUTATIONIBUS, *manè discutienda in Scholis Medicorum, die Martis decimâ- octavâ mensis Februarii, anno Domini M. DCC. XLIV.*

M. ANTONIO DE JUSSIEU, Regi à Consiliis & à Secretis,
Regiæ Scientiarum Academiæ, Regiarumque Societatum
Angliæ & Prussiæ Socio, Botanices in Horto Regio Parisiensi
Professore ac Demonstratore, Doctore Medico, Præside.

Herbis, an ferro promptior tutiorque abscessuum curatio ?

I.



MIRABILEM humani corporis mechanisum, diversam organorum
eius fabricam, mutuum diversarum ejus partium inter se consensum ;
motus continui necessitatem, & assiduæ liquorum cum solidis luctæ
leges qui concipiet, is in eo omnium alterationum, quas morbos nun-
cupant, causas percipiet ; quibus vel à primâ mundi ætate primos ho-
mines novâ licet validâque constitutione dotatos, internè aut externè
obnoxios fuisse non est dubitandi locus. Internorum tunc suis sibi quicquid naturâ di-
ctante, Medicus erat ; externi, si partem aliquam corporis à manûs propriæ auxilio re-
motam tentarent, opitulatricem alienam postulabant ; inde prima artis Chirurgicæ ori-
go, ab incunabulis ingenuæ, simplicis, ac fuci nesciæ, quæ antiquitûs Medicina non au-
diebat, nisi à communi ei nomine, indito cum cæteris artibus corpori roborando,
mundando, ungendo, decorando & servando addictis, & à generalis medendi rationis
etymo deducto. Quibus verò tunc instrumentis antiqua hæc naturalis Chirurgia, ad eas
quas hodierna sibi vindicat ægritudines curandas uteretur, inquirere qui vellet, apertum
ubique agrestem naturæ librum consulat, nihil in eo de ignis atroci, nihil de sævo fer-
reorum instrumentorum apparatu reperiet, immò simplicissima, lenissimaque ei è ve-
rerabilium passim & spontè nascentium delectu medicamina tantum occurrent : ho-
rum vires & extemporaneum usum noscere, non Medicorum solum, sed & Regum
Imperatorumque quondam suprema laus erat. Quantum autem hæc internè externè-
que conducant, Medicis indicare supervacaneum ; verum immò quanta ad mor-
bos externos, quanta ad curandos imprimis tumores, auxilia herbæ præbeant, pro-
bare necessum est. Diversa à diversis humoribus, à diverso affectarum partium situ,
nomina sortitur Affectionum id genus, ad eos potissimum qui in abscessum à *conge-
stione* degenerant, hic loci nostra refertur cura, quorum historicas apud Antiquos cau-
sas, pro variis quibus hi viverent moribus, sigillatim persequi, si non difficile, saltem
longius foret : unum sit pro rato illos simplici & leni naturalis Medicinæ praxi
herbarum scilicet applicatione promptè, tuto ac feliciter curari ; eamque praxim
quadraginta sæculorum usu & experientiâ confirmatam esse.

A

ERUPTO intus è vasis humore, tumentis sub cute, quâvis in parte coacervato facilem præbendi exitum, quânam alia priscis his temporibus usitata ratio? Incausum quæritur; an acuto aut incisorio è silice, instrumenti metallici vices, cæteris ut olim in artibus, agente? Usus autor nullus est, repugnassetque fragmentorum facilius fortè in vulnus intromittendorum discrimen; an ære, ferro longè antiquiori? Noxam quis nescit sanguini ex contactu ejus sæpius certam: an ferro? At sub primâ solum mundi annorum chiliadis sine, è sacrorum Codicum, & Josephi historici autoritate à Chaldæis tantum fuisse usitatum constat; & apud Ægyptios, Græcosque antiquiores, Medicinâ jam in artem compositâ, imbutos, adèd rarum fuisse, ut Homero passim & Herodoto referentibus non aliis illi quam æreis armis uterentur: ferrea etiam in Chirurgicis usus instrumenta Romanis ante Archagati *vulnerarii* in urbem adventum DXXXV. Reipublicæ anno, fuisse ignota, & exosum perterritis civibus, secandi sævitia, novi hospitis nomen transisse in carnificem & in tædium à Plinio signatum, accepimus. Quibus verò veteris Medicinæ numinum, heroumque opulatrix gloria nititur, nisi vegetabilibus? Scalpello, cultrove Græca, Romanaque antiquitas sacras Medicantes sui Appollinis imagines unquamè armavit? Has conspiciere erat tertio etiam Æræ Christianæ sæculo in quibus *Salutaris* nomine insignitus, herbarum fasciculos ægris dextrâ protendens depictus variis in monumentis nobis est superstes. Curationibus à Pæonis successoribus, Æsculapio, Chirone cæterisque Medicinæ principibus, deincepsque Machaone, Podalirio inclytisque aliis Medicis, herbarum ope perfectis, nihil apud Poetas magis decantatum. Ne verò ab extraneis tantum omnis autoritas peti videatur, Cornelio Celsò, Herophilum nullum morbi genus absque vegetabilibus medicamentis non curasse alleganti, æquior fides erit; & cum ipsemet Celsus, cui ad punctiorem in abscessibus ferrum ignotum erat, scalprum in extremâ tantum morbi periodo suadeat, ipseque magis cataplasma arrideat, herbarum usui plus inde favoris dari reputandum est; & reverà si attendas ad applicandorum opportune simplicium consilium, ad convenientium defectum, ad applicationis modum, ipsamque applicationem illico percipies tam consistentis Medici quàm agentis non mediocrem esse curam, ex quâ major prudentia, quàm in strenuâ aut lanceolâ latâ, aut scalpelli recti, aut cultelli falcati, aut forficularum tractatione emicat, nec minor peritia laudatur.

III.

VERAS hujusce abscessus causas ignorantem, ad symptomata & progressum ejus minus attentum, & de conclusi humoris indole dubitantem, quæstionis judicem recusamus; sanguiferis lymphaticisque vasis, & nervorum fasciculis, millenisque vasorum ramis ramulculisque elasticâ vi præditis totam corporis machinam permeari, pro certo habendum; liberum vel velocem, vel lentum liquidorum circuitum, vel à continuo supervenientium impulsu, vel ab impresso vicinorum vasorum motu ac elatere, vel ab ipsorummet liquorum fluxiliori, aut spissiori substantiâ pendere omnino tenendum, nec eos aliquâ in parte quasi è massâ exules detineri, nisi à totius cachexiâ, aut ab acutis aliquando malignis, aut chronicis febribus illius depurationem criticam indicantibus. Hinc porro iners visciditate lympa, vel negantes se attritui & canaliculorum diametro impares in sanguine molecular, vel fortuita vasis à vicino lateralis compressio, tot sunt liquorum obices, tot violentæ vasorum quibus continentur dilatationis, deinceps diæreseos causæ. Quâ datâ portâ tunc effluunt è rupto vase liquores, nullâ præterfluendi, nullâ retrogradiendi concessâ viâ; & crescente succedentium copiâ, undequaque vasorum vicinorum interstitia penetrant, ipsamet comprimuntur vasa ruptum circumdantia, & ea quæ cutem percurrunt, nullo exteriori nisi proprio membranarum repagulo coercita extenduntur, ipsaque cute paulatim cedente manifestat se per congestum vulgò appellatus *tumor*, ex sanguinis undique coarctati æstu rubicans, & dolore gravi ex articularum & nervorum in coacervatam materiam solidi vices agentem impulsibus lancinans, qui si mollem afficit partem, minor; si tendinosam, si nerveam

membranaceamque acutus, nec sine febre: quò strictioribus fibris laxioribusve cutis obstat, impetumque impetu repulsat, oppositis ei externè aut internè vasis magis vel minus cedentibus, eò ampliorem, profundiorè, vel magis extimùm & minorem locum congesta moles occupat; ea tot liquoribus constans, præterea etiam avulsis ac separatis è gemino lymphaticorum, nerveorum, sanguiferorum vasorum disruptorum extremo laciniis atque fimbriis augetur, quæ simul permixta, si attritu & digestionè non mollescat, gravè solidis exitum minantur; sin liquidior facta moles, & ex chyli, cruoris, lymphæ, bilis, albo, rubro, limpido, flavo commixtis agitatisque coloribus albicantem nacta judicatur, & digito dilatatam cutem palpanti molliorem se præbet, dolore jam mitescente, ad proximam felicemque foras eruptionem accelerandam, auxiliatrices manus reposcit.

IV.

QUA olim abscessus facie, nunc eadem se manifestant, critica plerumque eadem iis causa, iisdem cruciant symptomatis: non absumitis itaque sanandi ratio instituenda est; immò dum atate nostrâ vegetabilium suppellex amplior curationis instrumenta multiplicat, facilitatem auget: causæ igitur sic ratione habita, ut interiori curæ exterior respondeat, naturæ depurationis opus ambienti obsequiaris. In quocumque voles morbum gradu conspice, Herbis potiùsquàm ferro primùm curationem tenta, infelicitè vix unquam res tibi succedet; his opportunè si principio uteris, cum factâ mox diæresi oscillantia adhuc disrupti vasis ora suo nondum tono penitus orbata, parvam nondùm alteratam omninò sanguinis extra effusi copiam, totique massæ sanguinæ analogam ipsi restituere valent, blandis resolventibus per totum exteriùs admotis, nobiliori humoris parti stimulos dabis, quibus vasa repetat, & sero per cutis poros eliminando vias aperies; sin spe tibi nec resolutionis, nec resorbitionis ullâ affulgente morbus ingravescat, violentiorem arteriarum in congestam molem, & molis in arterias impetum emollientibus compesces; sanguinis fervorem externâ rubedine indicatum admittis leviter acescentibus & refrigerantibus temperabis; molestum anodinis dolorem demulcebis, & immensæ tensioni cutanearum fibrarum relaxatione occures: quibus singulis simplicium Medicaminum generibus, tùm per repetita sæpiùsque renovata Cataplasmata, tùm per solum frequentem adhibitis, magis atque magis attenuata cutis, vel levissimo emollitæ molis ad umbonem impulsui cedit, & quasi ultrò solvitur; tunc maturum, ut inquiunt, purulentum liquamen, effracto quo retinebatur claustrò copiosè erumpens, juvante digitorum ad tumoris vicinias compressione, quam vi sibi fecerat, sedem ferè vacuum relinquit; dùm lanceolâ latâ, aut scalpello facta solutio dolori lentam vel nullius in cute regenerationis spem addit. Neù tamen absolutam hac evacuatione curationem puta: præcavenda est reliquiarum puris ora vasorum interstitiaque intus obducentis nidulatio, atque earum deterfio peragenda; quod farinae Cataplasmatibus ad naturæ imitationem perages; frustra autem id præstabis vulneribus novis, dum cultello incisorio labra vulneris secantem excitabis, & puri eliminando massam sanguineam jam vappidam inficiendi adhuc occasionem præbebis. Abstergendum ulcus in ipsis etiam reconditoribus recessuum anfractibus; accuratâ è vulnerariis lenibus plantis decocti injectione mundabis: purulentarum particularum corruptionem, sphacelumque solidis exitium partibus quandòque minitantem ardentibus è fructibus fermentatis & distillatis liquoribus, decoctisque aromaticis avertes; iisque & exlixiviosis è stirpium cineribus eductis salibus disruptorum vasorum in extremis appendices exinanitas à vivo separabis; tuncque sanguine ad sejuncta vasorum ora undèquæque appellente, ac cessante compressionis & corruptionis metu balsamicis ab aëris insultibus tueberis, sanguinis glutini gluten addes, carnibus vitam reddes, mutuamque partium separatarum cohesionem absque scdâ cicatrice accelerabis.

V.

VULGATISSIMO longoque jam apud Medicos in curandis abscessibus recepto ferri usui, herbarum applicationem, quis non sine gravi querelâ anteponat? Jam

reclamantium turbam audio? Rudi, ut aiunt, antiquorum arti perfectiorem recentiorum experientiam opponunt, herbisque non primariam sed maturandi solum humoris congesti cutisque emolliendæ gloriam concedunt; ingens certè artificum negligentia speciem! qui puris legitimam conditionem herbarum esse beneficium, idque curationis opus præcipuum esse ignorant, & fabrili vulnus cum dolore statim inferentis instrumenti mechanicæ uti malunt, quàm nobiliori plantarum vires cognoscendi studio infudasse, labori parentes, undè mitiora simplicis naturæ auxilia depromerent; vegetabilium Chirurgiæ famulantium neglectu erroris culpam non unâ excusatione velant; dum enim ea aut strictiorem cutis texturam attenuandi imparia, aut tenaciorem humoris extra diffusi substantiam resolvendi, atterendi, emolliendique impotentia accusant, liberali naturæ insultant, ejus opum delectus ignari, vulneris inutilis, sæpè etiam noxii dolorem, lento quandoque sed tuto naturæ in sanguine depurando operi anteponunt; novas, dum puri per vim exitum parant, scalprum interius inferendi rationes allegant, superstitis nempe puris corruptelam, dilatandos in quos profundè irreplevit cuniculos, præcavendam subjeçtorum tendinum inflammationem, ossium cariem: at gravem sæpius providæ naturæ injuriam asserunt, nullâ ad umbilicalis funiculi prolapsum, nullâ ad facilem ab avulsâ placenta cicatricem, nullâ ad variolarum desiccationem factâ attentione; meras etiam dicas, neglectæ antè oportuna curationis, & spreta frequentis herbarum convenientium applicationis excusationes, sævissimis occasione operationibus præbituras, non sine gravi ægrorum dolore, longo curæ tædio, profundioris & duræ cicatricis difformitate, scditate, magnoque cutis impendio, Absit tamen ut tam iniquè hoc in morbo ferri usum semper damnemus, quin salutarem initio humoris resolutioni locum dandi causâ phlebotomiam suadeamus, quin & necessariam scalpri, cultelli incisorii, forficularumque opem censeamus, cum molito licet tumore, nec dùm aperto, dolores augmentur; cum erupti spontè purulenti liquaminis pravam conditionem & color illegitimus & dolor non cessans indicant, cum etiam post diurnam humoris extracti evacuationem ulceris vel ima, vel extrema, vel exterior pars indurefcit, sed raram hanc minus solita, potiore antiquam vulgaria & frequentia morbi symptomata curandi rationem postulant.

Ergo Herbis, quàm ferro promptior tuiorque abscessuum curatio.

DOMINI DOCTORES DISPUTATURI.

M. Tuffanus-Gilbertus Tomland, Consiliarius Medicus Regis, ordinarius in ejus Castellæ.

M. Jacobus-Albertus Hazon.

M. Gabriel-Antonius Jacques.

M. Gaspardus Cochou du Puy, Regis Consiliarius in Arce Maritimâ Rupsfortensi, Anatomis & Chirurgiæ Professor Regius.

M. Claudius-Carolus de Jean.

M. Claudius de la Vigne de Frecheville, Medicus Regis & domus Regiæ ordinarius.

M. Jacobus-Francisus Vandermonde.

M. Francisus-Felicitas Cochou, Scholarum Professor.

M. Joannes-Damianus Chevallier, Regis Consiliarius Medicus ordinarius in Insula sancti Dominici.

Proponerebat Parisiis; JOANNES-CLAUDIUS MUNIER, Laudonensis, Consiliarius Medicus Regis ordinarius, nec non domus Regiæ Invalidorum ducum & militum, Saluberrimæ Facultatis Medicinæ Parisiensis Baccalaureus, A. R. S. H. 1744. à sexta ad meridiem,

Typis QUILLAV, Universitatis & Facultatis Medicinæ Typographi, 1744.